

**Txhua txhia haivneeg ntshai poobsiab nthav, tej tebchaws uas muaj vajntxwv kav, puavleej nyob tsis ruaj tsis khov. Vajtswv ua suab nrov ntho tawg ntho, lub ntiajteb ploj ntais mus.**

Tus TSWV muaj hwjchim loj kawg nkaus nrog nraim peb nyob. Yakhauj tus Vajtswv yog peb lub chaw nkaum.

**Nej cia li los xyuas tej uas tus TSWV twb ua lawm. Nej cia li saib tej txujci tseemceeb uas nws ua hauv lub ntiajteb no.**

Nws ua rau tej kev tsovrog hauv ntiajteb no nyob tiaj tus, nws lov ntho tej qhaub hneev nti, nws ua rau tej hmuv dam pes daws, thiab nkaus hlo tej vabhlaun ntis ntaj ntis riam pov kiag rau hauv cubtawg.

**Nws hais tias, Nej cia li tseg kiag tsis txhob sib tua, nej yuav tsum paub hais tias, kuv yog tus Vajtswv uas kav tagnrho lub ntiajteb no, thiab txhua txhia haivneeg huv tibi.**

Tus TSWV muaj hwjchim loj kawg nkaus nrog nraim peb nyob, Yakhauj tus Vajtswv yog peb lub chaw nkaum. (Nkauj Qhuas Vajtswv 46)

### **363**

## **KEV LEES TXIM**

Vajtswv es, Koj yog tus muaj nploosjiaib hlub tsis tseg, thov koj hlub kuv lauj. Koj yog tus uas hlub heev kawg nkaus, thov koj tshem kuv tej kev txhaum tawm mus.

**Thov koj ntxuav kuv tej kev phem tagnrho mus, kom kuv muaj lub siab dawbpaug, tsis tshuav ib qho txhaum li.**

Kuv lees kuv tej kev txhaum, kuv niajhnub nco ntsoov hais tias, kuv muaj txim. Kuv tau ua txhaum tawmtsam koj, tawmtsam koj ib leeg xwb, thiab ua tej uas koj suav hais tias, yog kev phem.

**Qhov uas koj txiav txim rau kuv, yeej yog kev yog cai lawm. Koj yeej muaj cai rau txim rau kuv tiag.**

Kuv muaj txim txij hnub yug kuv los, kuv yog neeg txhaum txij puag hauv nruabthiab los. Lub siab dawb, siab zoo thiab tej lus tseeb, yog yam uas haum koj siab. Thov koj qhia koj lub tswvyim rau kuv. Thov koj muab kuv tej kev txhaum tshem mus, kuv thiaj yuav huv tsis muaj ib qho txhaum hlo li.

**Thov koj ntxuav kuv tej kev txhaum, kuv thiaj li yuav dawb dua li tej daus.**

Thov koj pub kuv hnob lub suab lomzem thiab tej kev zoo siab. Txawm yog koj ua rau kuv mobsiab, thiab kuv lub siab ntais rhe lawm los, kuv tseem yuav rov zoo siab ntxiv thiab.

**Thov koj tsis txhob xam pom kuv tej kev txhaum, thov koj muab kuv tej kev txhaum tshem huv tibi mus.**